

Menningar- og íþróttasvið f.h. Reykjavíkurborgar, kt. 530269-7609, og Tónskáldafélag Íslands (TÍ), kt. 660269-0889, vegna Myrkra músíkdaga, gera með sér svofelldan:

SAMSTARFSSAMNING

um fjárstuðning Reykjavíkurborgar við Myrka músíkdaga á tímabilinu 1. janúar 2023 til 31. desember 2025.

1. gr. Markmið og framlag Reykjavíkurborgar

Meginmarkmið með stuðningi Reykjavíkurborgar við Myrka músíkdaga er að:

- hlúa að fjölbreytileika í íslensku tónlistarlífi
- vekja athygli á og kynna íslenska samtímatónlist hér á landi og erlendis
- tryggja samfellu og framþróun í árvissri hátíð sem laði að sér gesti til borgarinnar

Á samningstímanum skuldbindur Reykjavíkurborg sig til að greiða Tónskáldafélagi Íslands fjárhæðina kr. 3.000.000 árlega á tímabilinu 2023-2025.

Greiðsla framlags skiptist þannig á ári hverju:

kr. 2.000.000 1.-3. jan

kr. 1.000.000 1.-3. feb

Framlag borgarinnar greiðist inn á bankareikning Tónskáldafélags Íslands nr. 0513-26-007644.

Framlög Reykjavíkurborgar vegna árána 2024 og 2025 eru með fyrirvara um samþykkt fjárhagsáætlunar þeirra ára. Verði gerð umtalsverð breyting til lækkunar á fjárveitingu til samningsins á fjárhagsáætlun taka aðilar upp viðræður um aðlögun samstarfsins að breyttri fjárveitingu.

2. gr. Forsaga, markmið og framlag Myrkra músíkdaga

Myrkir músíkdagar eru tónlistarhátíð sem stofnuð var af Tónskáldafélagi Íslands árið 1980 og hefur verið haldin reglulega síðan þá. Hún er elsta starfandi tónlistarhátíðin á Íslandi. Stefnu Myrkra músíkdaga má taka saman í þrjú meginþætti sem eru frumflutningur á íslenskri samtímatónlist, Íslandsfrumflutningur á erlendri samtímatónlist og endurflutningur á íslenskri og erlendri samtímatónlist.

Markmið Myrkra músíkdaga er

- að vera framsækin
- að fylgja straumum samtímans
- að ólíkar stefnur tónlistar finni heimili og samruna á hátíðinni ásamt ólíkum listformum menningar, tónlist, dans, myndlist og innsetningum.

Tónskáldafélag Íslands tekur að sér að halda Myrka músíkdaga árlega 2023, 2024 og 2025.

Hátíðin fer fram á hverju ári í miðju skammdeginu í lok janúar. Allt frá árinu 1980 hafa Myrkir músíkdagar verið einn helsti vettvangur framsækinnar nútímatónlistar á Íslandi og skapað mikilvæga umgjörð um frumsköpun og tilraunastarfsemi. Frumflutningur íslenskra tónverka gegnir iðulega veigamiklu hlutverki í dagskránni auk þess sem barnamenningu er gert hátt undir höfði. Á hátíðinni er lögð áhersla á áhugaverða og skemmtilega tónleika auk þess sem boðið er upp á ýmsa

tónlistartengda viðburði, sýningar, fyrirlestra, málstofur og fleira. Myrkir músíkdagar hafa fyrir löngu áunnið sér sérstakan virðingarsess í íslensku tónlistarlífi og vakið athygli langt út fyrir landsteinana.

3. gr. Ábyrgð

Tónskáldafélag Íslands ber ábyrgð á að starfsemi Myrkra músíkdaga fullnægi kröfum um fagmennsku og gæði. Tí ber ábyrgð á skuldbindingum sem hátíðin eða aðilar á hennar vegum stofna til í tengslum við þennan samning. Tí er með öllu óheimilt að framselja greiðslur samkvæmt samningi þessum til þriðja aðila og setja hann með öðrum hætti til tryggingar fjárskuldbindingu.

4. gr. Kynningarmál

Tónskáldsfélag Íslands ber ábyrgð á markaðssetningu Myrkra músíkdaga og leggur sig fram um að skapa sem besta og jákvæðasta umfjöllun og kynningu á hátíðinni í innlendum sem erlendum fjölmiðlum.

Á öllu kynningarefni Myrkra músíkdaga, hérlandis jafnt sem erlendis, skal koma fram að Myrkir músíkdagar séu styrktir af Reykjavíkurborg. Reykjavíkurborgar skal þannig getið sem bakhjarls í öllu kynningar- og markaðsefni Myrkra músíkdaga með því að hafa auðkennismerki Reykjavíkurborgar sýnilegt.

Hafa má samstarf við Reykjavíkurborg til að kynna og markaðssetja viðburði sem ætla má að höfði til íbúa og erlendra gesta. Reykjavíkurborg fær myndir af viðburðum ef óskað er eftir og/eða má senda ljósmyndara til að afla markaðsefnis fyrir almennt markaðsstarf fyrir Reykjavík.

5. gr. Samskipti og eftirlit

Skrifstofa menningarmála á menningar- og íþróttasviði Reykjavíkurborgar er tengiliður samningsins við Tónskáldafélag Íslands. Samráðsfundir samningsaðila skulu haldnir í maí eða júní ár hvert 2023-2025, þar sem farið verður yfir framkvæmd samningsins. Tí leggur á þeim fundi fram endurskoðað uppgjör eða áritaðan ársreikning vegna fyrra árs og skýrslu nýliðinnar hátíðar ásamt áformum um hvernig næsta hátíð muni uppfylla markmið samningsins. Menningarborgin boðar til fundanna.

6. gr. Vanefndir og meðferð ágreinings

Telji Tónskáldafélag Íslands hættu á að geta ekki uppfyllt samningsbundnar skyldur sínar skal tengilið Reykjavíkurborgar á menningar- og íþróttasviði tilkynnt um það skriflega án tafar. Ef ekki tekst að endurskoða verkefnaáætlun þannig að markmiðum samningsins verði náð, er Reykjavíkurborg heimilt að fella niður greiðslur þar til Tí hefur sýnt fram á að það muni standa við samningsbundnar skyldur sínar samkvæmt ákvæðum samningsins, en að öðrum kosti rifta samningnum. Ef sýnt þykir að framlag Reykjavíkurborgar hafi verið notað í öðru skyni en samkvæmt samningi þessum, áskilur Reykjavíkurborg sér rétt til að krefjast endurgreiðslu framlagsins að hluta eða öllu leyti eða rifta samningnum.

7. gr. Gildistími

Samningur þessi er gerður í samræmi við samþykkt menningar-, íþróttá og tómstundaráðs þ. 28. nóvember 2022 um styrkveitingar ráðsins fyrir árið 2023. Samningurinn gildir til 31. des. 2025. Samningurinn er gerður í tveimur samhljóða eintökum og heldur hvor samningsaðili sínu eintaki.

8. gr. Breytingar á samstarfssamningnum

Samningur þessi er lýsing á samningssambandi aðila, réttindum þeirra og skyldum og gengur framar fyrri skuldbindingum, munnlegum og skriflegum eða öðrum samskiptum. Viðbætur við samning skulu vera skriflegar og undirritaðar af samningsaðilum.

9. gr. Staðfesting og meðferð ágreiningsmála

Samningurinn er gerður með fyrirvara um samþykkt borgarráðs og samþykkt fjárhagsáætlunar Reykjavíkurborgar vegna áraanna 2024 og 2025. Rísi mál út af samningi þessum skal það rekið fyrir Héraðsdómi Reykjavíkur.

Samningur þessi er staðfestur með rafrænni undirritun fulltrúa beggja aðila samningsins.

f.h. Reykjavíkurborgar,

María Rut Reynisdóttir

f.h. Tónskáldafélags Íslands,

Gunnhildur Einarsdóttir